

A D V I S, S V R

CE QVI EST A FAIRE,

TANT CONTRE LES CATHO-

liques simulez, que les ennemis

ouuerts de l'Eglise Catholique

Apostolique & Romaine.



A PARIS,

Chez Nicolas NIVELLE, ruë S. Iaques,
aux deux Colonnes.

Et Rolin THIERRY, ruë des Anglois,
pres la place Maubert.


Libraire & Imprimeur de la sainte Vnion.

M. D. LXXXIX.

AVEC PRIVILEGE.

Dup

Not cataloged



ADVIS, SVR

CE QVI EST A FAI-
re, tant contre les Catholiques simu-
lez, que les ennemis ouuerts de l'E-
glise Catholique Apostolique &
Romaine.

LE salut du peuple est pre-
ferable à toutes choses,
dict la Loy des douze Ta-
bles, qui merite estre en-
têduë d'un chacun, & es-
crite en lettres d'or, non seulement par
tous les coings des ruës, mais en toutes
les parois de noz maisons: à fin qu'ayans
ceste Loy perpetuellement deuant les
yeux, nous ne pretendions rien qui ne
soit au bien & salut commun de la Re-
publique, de la bonne ou mauuaise dis-
position de laquelle, depend la conser-

4

uation ou perte des biés & de la vie d'un
chacun.

IL n'y a homme de bien qui ne soit
d'accord qu'il faut inuiolablemēt obser-
uer ceste Loy, mais il y en a beaucoup
qui sont diuertis de l'observation, trom-
pez & deceuz d'une vaine apparence des
choses.

ILs esleuent iusques au ciel la clemē-
ce & misericorde, & ont en si grand hor-
reur toute rigueur & cruauté, que pour
pardonner à quelques-vns, ils mettent
le public en extreme danger.

NOUS recognoissons avec eux qu'il
n'y a rien plus loüable & digne d'un per-
sonnage grand & illustre que la clemen-
ce, & que la misericorde est la premiere
& plus honoree de toutes les vertuz.

MAIS vser de misericorde & sagesse
tout ensemble, il n'est pas donné à tous.
S. Augustin dict, que nostre Dieu a faict
misericorde à plusieurs les faisant mou-
rir temporellement. La chair & le sang
n'apprennēt pas celà. Si nous les croyōs,
nous serons bien souuent cruels à nous
mesmes, quant nous voudrons faire mi-
sericorde à autrui, comme plusieurs ont

faict durant ces troubles, n'ayans ceste Loy du bien public assez imprimée en l'esprit, & craignant par trop d'estre estimez cruels, à faute de considerer, pourquoy, & cōtre quels ennemis nous auōs à faire.

ENTRE les guerres passées, les vnes ont esté pour l'estat seulement, les autres ont esté pour l'estat & pour la vie, & les aucunes pour l'estat, pour la vie & pour la religion.

DE la premiere qualité estoit la guerre d'entre Pyrrhus & les Romains, lesquels ont vsé les vns enuers les autres de plusieurs hōnestetez : Pyrrhus leur a donné ses prisonniers de guerre sans rançon, & ils luy ont enuoyé pieds & mains liez vn des siens qui promettoit de le tuer.

POUR la seconde espee, on tire en exemple Hannibal & les Romains, lesquels ayans faict preuue de la perfidie & desloyauté Punique, ont faict la guerre à outrance, & n'ont iamais cessé qu'ils n'ayent rasé leur ville, & poursuiuy Hannibal iusques à la mort.

ET quant à la troisieme on peut voir en l'escriture saincte, les enfans d'Israël

contre Amalech, où il a esté commandé faire mourir les Amalechites iusques au dernier : ce que n'ayant esté fait en la personne du Roy Agag prins à mercy par Saül, il en a perdu la vie & sa posterité, le Royaume.

LA guerre que nous auons contre Henry Bastard d'Albret est de ceste espece, il pretend la Courōne encore qu'il soit esloigné du tyran dernier decedé de plus de dix degrez selon le droit Canon, & de plus de vingt & vn selon le Droit Ciuil.

IL n'y a bandoulier si adonné à larcin qu'il a tousiours esté dès sa ieunesse : c'est vn paillard infame, qui a laissé la ville d'Agen tesmoin du tour le plus lasche qui fut iamais commis en assemblee de femmes chastes & pudiques : C'est vn tyran qui a supprimé la religiō en Bearn, nonobstant sa profession Catholique faite à Paris, & sa confession de foy par luy enuoyce exprez par ses Ambassadeurs à Nostre Sainct Pere : C'est vn heretique relaps, qui a deffendu & deffend à ses subiects tout exercice de religion Catholique, & fait proceder extraor-

dinairement, contre ceux qui vont au
païs du voisin participer aux saincts Sa-
cremens: C'est vn fedifrage qui n'a ia-
mais voulu entretenir aucun traicté de
paix: C'est vn perfide, qui a tousiours
cōtre sa foy retenu les villes que par plu-
sieurs Edicts de pacification il auoit pro-
mis rendre.

Donc en ceste guerre où il s'agist de
l'estat de la vie & de la religion, il faut fai-
re ce que Dieu a commandé à Saül con-
tre Amalech, & ce qu'il ordōne aux au-
tres Rois, quand il dict, qu'il donnera le
Royaume à celuy qui ne fera point infle-
xible aux prieres des meschans & ne leur
pardonnera point.

IL NOVS faut donc conclure avec
la parole de Dieu, que l'on ne doit en ce-
ste guerre pardonner à qui que ce soit, si
nous ne voulons en imitant Saül subir
les mesmes peines qu'il a endurees.

TOUTESFOIS si la redemption des
captifs dissuade pour vn temps l'obser-
uation de ceste ordonnance, à tout le
moins nous doit elle seruir pour vne de-
fence de demourer avec les adherans &
complices de ce bastard tyran.

IOINCT que Nostre Sainct Pere par sa Bulle excommunie tous les adherans de cest heretique, tellemēt qu'il ne nous est possible viure avec eux en repos de conscience.

D'AUTRE-PART l'experience nous enseigne, que le mauuais demourāt avec le bon, ne se faiēt pas meilleur, & qu'au contraire, le bon est contaminé par la presence du meschant: de façon que laisser entre nous les simulez Catholiques adherans du Bearnois, c'est se reculer de l'amandement & reformation esperee aussi loing comme nous pensons en approcher.

D'AVANTAGE apres tant de trauerses que nous auons eu, il n'y a celuy qui puisse ignorer que l'ennemy domestic est plus dangereux que l'estranger, les pertes de Rennes, Senlis, & d'une infinité d'autres villes nous le font sentir à nostre grand malheur.

OVTRE plus ces simulez Catholiques viuēt en crainte perpetuelle d'estre tirez en Iustice, ou autrement preuenuz pour quelque soupçon que l'on aura cōtre eux, dont ils sont continuellement
bourrelez

bourrelez en leurs ames, tellemēt qu'ils sont contrainsts ou de s'en aller d'eux-mesmes, ou de faire quelque entreprise contre nous, pour auoir moyen de s'exēpter de leur misere par nostre perte & ruine.

LVTHER souloit dire que cependāt que l'on s'amuseroit à combattre vne de ses heresies, il en inuenteroit tousiours quelque autre: ainsi ces simulez Catholiques descouverts en vne de leurs conspirations, dresseront tousiours quelque nouuelle partie, pour nous perdre entierement avec la religion.

SI DONC nous ne pouuons demeurer avec noz simulez Catholiques sans extreme danger, qu'elles occasions nous peuuent empescher de les mettre hors? On dit qu'il y en a sept.

A SÇA VOIR qu'ils sont difficiles à congnoistre, pour ce qu'ils assistent tous au seruice diuin faisans contenance de Catholiques.

QVE si nous les chassons: Les ennemis chasserōt aussi de leurs villes les Catholiques qu'ils laissent viure en paix avec eux.

QUE le nombre de noz Catholiques simulez est grād, en sorte que si nous les enuoyons dehors nous rendrons nostre ville deserte.

QUE les parens des chassez serōt mal contens, & pourront executer vne dangereuse sedition ou quitter la ville.

QUE par ce moyen les artisans ne seront plus employez à gagner leurs vies, ce qui pourra causer vne reuolte ou quel que grand desastre.

QUE quand il sera besoing de quelque subuention pour la guerre, il sera impossible de la leuer pour le peu d'habitās qui restera en ceste ville.

QU'AY contraire les chassez fortifieront l'ennemy de leurs personnes & biens.

QUANT à la premiere obiection, la preuue ne nous manque point cōtre vne infinité, qui depuis l'exécution du iuste iugement de Dieu contre le dernier de Valois ont parlé à l'aduantage du tyran de Bearn, chose deffenduë sur peine de la vie par ordonnance publice en tous les carrefours de ceste ville.

A LA deuxiesme obiection, il est fa-

cile de respondre, que les Catholiques demourans és villes ennemies sont en liberté ou captifs.

SI en liberté on ne peut dire qu'ils ne soient excommuniez, puis qu'ils continuent de demourer volontairemēt avec les declarez & manifestes ennemis de Dieu. Tels excommuniez ne nous doiuent faire desuoyer du chemin de salut.

SI contre leur volonté, ils seront bien aises d'estre chassez, pour ce qu'ils receuront liberté par ce moyen.

QUOY que soit si les vns & les autres ont bonne volonté, il leur est plus expedient de sortir de Sodome & de Gomorre que d'y demourer.

ALA tierce & quatriesme obiection il se peut dire en general, que si la quantité des meschans est si grande, & si le nombre de leurs parens affectionnez est tel que l'on pretend, c'est vn pur auenglement de tenir tant d'ennemis avec nous.

ET pour respôdre à la troisieme obiection en particulier, les Catholiques de l'Vnion ne sont graces à Dieu en si

petit nombre, que quand ils seront seuls à Paris on puisse appeller leur ville deserte, elle sera tousiours la plus peuplee du Royaume.

SAINCT Augustin dict, que celuy qui est sans amis est seul en quelque grande compagnie qu'il se puisse trouuer. Et S. Gregoire philosophant en Chrestien, dict, que celuy qui est delaisé de Dieu est seul, nous donnant à entendre que nous ne pouuons estre qu'assez accompagnez, quand il plaist à Dieu nous assister par sa grace, ce qu'il ne fait avec ceux qui demeurent volontairement avec ses ennemis.

A v resté si les ennemis chassent d'avec eux les Catholiques, il y en a beaucoup qui se viendront rendre avec nous si nous polions bien ceste ville, & suppleront par ce moyé au deffault des absens.

LA quatriesme obiection, sera refutée en particulier, quâd nous considerons que ceux qui seront marriz d'estre separez des ennemis de Dieu sont excômuniez.

A LA cinquiesme, les ouurages ser-

uans à la guerre & aux viures serōt tousiours de requeste, & y aura par ce moyē dequoy employer beaucoup de gens.

QVANT aux autres artisans si à faute d'estre employez ils se trouuēt en necessité, aussi bien nous faut-il ioindre à l'armee ou besongner aux fortifications pour la plus part.

ET en tout cas eslisans de deux maux le moindre, il n'y a pas si grand danger qu'une partie endure que de voir perdre toute la Republique Chrestienne.

ALA sixiesme obiection, tant s'en faut que les Catholiques simulez subuiēnēt aux necessitez de ceste guerre, qu'au contraire ils destournent & empeschent les autres d'y suruenir, & qui plus est, ils enuoyent & font tenir à l'ennemy tout ce qu'ils peuuēt gagner & recouurer des nostres.

LES chassant, nous pourrons retenir tout ce qu'ils ont en meubles, & nous aider des immeubles qu'ils possederōt en ceste ville, és enuiron, & és pais où noz chefs ont commandement, ce qui supplera tres-abondamment au deffault de leur absence.

FINALEMENT pour respondre à la
 septiesme & derniere obiection, si noz
 Catholiques simulez pouuoient seruir à
 la guerre, ils ne demoureroient pas en
 ceste ville inutiles à leur party, ils s'y tien-
 nent pour nous induire à faire paix avec
 l'heretique, pour accorder les brebis a-
 uec le loup. Ils ne manquent iamais d'ar-
 tifice pour cest effect par le ministere de
 Sathan : ils transfigurent vn sanguinaire
 tyran de Bearn en vn Roy bening & pa-
 cifique : ils nous proposent l'assurance
 des promesses du plus perfide & fedifra-
 ge heretique qui fut iamais : ils nous pro-
 mettent la conuersion de cest abomina-
 ble Renegat, lequel ayât deux fois renié
 Dieu & son Eglise, a faict guerre contre
 son Roy, contre son pais, & cõtre tous
 les Chrestiens de l'Europe pour y plâter
 son erreur : ils nous representent vaine-
 ment & faullement ses vertuz, comme
 sa charité enuers le pais qu'il a tant de
 fois destruit, sa vaillance Arabesque, sa
 chasteté cõiugalle, & nous vsent de mil-
 le paroles fardees, mellans l'amer avec le
 doux : ils nous mettent deuant les yeux
 ses dragons serpens & Anglois quouez

faisans mille peurs aux petits enfans.

Q V E fils ne peuuent rien par ces moyens & par les faulſes nouuelles dont ils trauaillent noz ſimples & credules, ils cherchent & eſpient toute occaſion de nous trahir & liurer le pluſtoſt qu'il ſera poſſible és mains de ces bourreaux, qui ont accordé avec le tyran qu'à la prinſe de Paris, ils pourront en vengeance de la ſainct Berthelemy continuer leur boucherie quatre heures entieres, à fin qu'ils puiſſent de ceſte ville faire vne colonie par le mariage de leurs ſoldats avec les femmes & filles qui pourront eſchapper leurs ſanglantes mains.

O R ſi nous chaffons ces ſimulez Catholiques, nous rompons en vn coup tous leurs mauuais deſſeings, nous rendons leurs perſonnes du tout inutiles à l'ennemy, & quant à leurs biens ſi nous les faiſſons dequoy aideront-ils à leur party.

C E S choſes eſtant ainſi comme elles ſont vrayes, ie meſmerueille cōme il eſt poſſible de trouuer des hōmes qui font ſi bon marché de leurs cōſciences & de leurs vies, que de tenir avec eux les en-

nemis de Dieu.

IOINCT que plusieurs gens de bien se sont desia retirez de ceste ville pour ne viure avec tât de faux freres, & que plusieurs personnages d'honneur tiennent propos d'en faire de mesmes si on ne prend meilleur conseil.

IL y a plus encores dequoy s'esbahir d'aucuns qui donnent aduis de pardonner à ceux qui ont conspiré la perte & ruine entiere de ceste ville le iour de Toussaincts, voulans faire croire qu'en cas semblable apres la punition de quelque petit nombre de coniurez on a pardonné & laissé viure les autres au milieu des gens de bien.

IL se pourra bien trouuer qu'en sedition populaire apres la punitiõ d'aucuns on a relasché les autres.

EN cas de rebelliõ d'une ville ou d'une prouince, il se trouue des exemples de pardon.

MAIS en coniuration de particuliers habitans contre l'estat vniuersel de la ville, non seulement la iustice a faict mourir ceux dont elle s'est peu saisir en ville, comme à Rome Lentulus & Cethegus, mais

mais on a poursuiuy Catilina & ses cōpagnons fugitifs iusques à les deffaire en bataille rangee.

QUE sera ce donc si la coniuration est accompagnee de prodicion & trahison de la patrie és mains d'un tyran qui a iuré la perte de la religion de la vie & des biens. Vitellius a faict mourir tous les six vingts traistres coupables de la mort de Galba, encores que ce fust son ennemy, que faut-il donc faire d'une prodicion & trahison si abominable que celle des polytiques du iour de Toussaincts.

AMVRATES ne pouuant pardonner à celui, qui par trahison luy auoit liuré Constantinople, il le fit escorcher & ieter sur luy des cendres chaudes & du sel, puis il le fit coucher en un liét soubs vmbre de luy faire reuenir vne peau nouuelle, pour le rendre capable du mariage de sa fille qu'il luy auoit accordé lors qu'il fit promesse de trahir la ville.

NOZ coniurez se sont mis en effort de pis faire au Christianisme, que ne fit iamais le trahistre de Constantinople, d'autant que le Turc laisse viure chacun en sa religiō, au lieu que le tyrā de Bearn

& ses complices, cōme la Iezabel d'Angleterre nē laissent tourment ny cruauté en arriere, dont ils n'vſent enuers les Catholiques, pour leur faire perdre avec la religion la vie eternelle.

IL y a encore vne autre opinion de ceux qui estiment, que non seulement il faut pardonner aux trahistres, mais qu'il faut benigneſmēt les recevoir avec nous en leurs maisons pour la cōmodité des deniers comptans qu'ils offrent, comme si les biens des crimineux de leze Majesté, n'estoient pas confiscables.

OR à iceux qui s'esloignent tellemēt de toute apparence de raison, ie ne diray autre chose que ce qu'à escrit le Sage, qui aime le peril, il perira en iceluy, Dieu vueille que leur perte ne soit de telle cōsequēce, qu'elle attire quāt & quāt avec soy la ruine de tous les bons, de tout le pais & de la religion en toute l'Europe.

EN ces difficultez j'espere que la misericorde & bonté de Dieu qui nous a miraculeusement conserué iusques icy, nous ouurira les yeux pour voir nostre erreur, & nous remettre au chemin de cōseruer avec noz vies la sainte religio.

IL nous fera d'auantage par son infinie bonté cognoistre qu'il ne le faut point renter & mespriser le secours qu'il nous offre par noz voisins vrayement Catholiques.

IL ne se peut nier que nous n'ayons beaucoup de Princes tres-dignes & tres-suffisans de gouverner vne Monarchie, plus grande sans comparaison que la nostre, & toutesfois si l'plaisoit à Dieu nous disgracier de tant que de nous en oster vn, comme il est mortel, ie ne scay si noz guerriers se pourroient accorder sous les autres, le danger y est trop grand & irreparable.

D'AUTRE-PART si nous venons à conferer nostre estat & disposition aux qualitez de noz ennemis, beaucoup de choses nous feront penser plus soigneusement à noz affaires.

LE tyrā de Bearn à deux sortes d'hommes obstinez à sō seruice, les heretiques & coupables de l'assassinat de Blois, & encores d'autres qui se laissent aller aux promesses des biens d'Eglise & des confiscations, & font la guerre à outrance.

ENTRE ceux qui suyuent noz chefs,

il y en a beaucoup qui supportent les ennemis, sous pretexte de parété, d'alliance ou ancienne conuersation.

C E tyran peut faire fons d'argent en Bourdellois, Limosin, Xainctonge, Rochelois, bas Poictou, Angoulmois, Touraine & Anjou, de toutes parts les heretiques contribuēt & mesmes les païsans, il n'est pas iusques aux soldats qui n'ayēt bourfillé pour le payement de ses estrangers.

T O U T ce que nous possedons est environné d'ennemis, il n'y a que ceste ville qui ait peu fournir argent pour le general, aujourd'huy elle est si espuisec qu'à peine se pourra elle fortifier, comme il est necessaire, & continuer la subuention des mois qui ne peut suffire que pour sa deffence particuliere.

C E tyran à secours d'hommes, d'argent & de munitions d'Angleterre & d'Escoffe aussi certain & plus proche que nostre secours d'Italie.

I L a en Allemagne & Suisse des adherans plus que nous, Dannemarc luy est assureé.

O N a recogneu des actions de ce tyrā

qu'il ne combat iamais s'il n'est plus fort de nôbre, ou en lieu si aduantageux, que la victoire luy soit certaine, & a tousiours ainsi réporisé depuis quinze ans, n'ayant le quart des moyës qu'il possède auourd'huy.

IL ne nous est donc possible de subsister, si nous ne prenons le secours du Roy Catholique, quelque chose que l'on puisse alleguer au contraire.

CAR de dire que nous soyons assez forts sans tel secours, les doubles pistolets & pieces de quarante sols enuoyees d'Espagne sont venuz bien à propos, nous estiôs mal sans celà, & auourd'huy nous sommes plus desnuez que iamais.

ET de dire que si on appelle l'Espagnol, la noblesse & beaucoup d'autres se rendront du party contraire.

PERSONNE ne se rëdra du party s'il est des nostres, selon le tesmoignage de l'escriture, & puis qu'ils ne sont des nostres, il vaut mieux qu'ils s'en aillent que de demourer icy, attendant quelque occasion de nous faire quelque mauuais tour.

D'ALLEGVER que son secours ne

sçauroit estre que de peu, & neantmoins qu'il vsurpera le Royaume, sil a si peu de moyen, commēt pourra-il faire vne telle vsurpation & la maintenir : Il en faut parler à la verité: Il est si puissant que durant la guerre de Flandres, il a avec le Pape & le Venitien combattu à Lepanthe, les forces du Turc que nous estimiōs inuincible, chassé le bastard vsurpateur de Portugal, deffaiēt l'armee de la Roynemere, rompu les Anglois, qui depuis vn an auoient prins terre en Espagne, il a deffendu ceux de Malte de l'inuasion du Turc, & deliuré l'Archeuesque & Electeur de Coloigne de la puissance de Casimir & de ses adherans.

ON adiouste que sil se trouue fort en France, il se saisira de noz villes, qui est vne obiection ordinaire d'heretiques, comme ils ont mis sus à feu Monsieur de Guyse qu'il vouloit enuahir la Couronne, & que Monsieur de Mercueur se veut faire Duc de Bretaigne: l'Espagnol nous a plusieurs fois secouru avec toute fidelité & sans rien entreprendre sur nous, comme aussi le Maltois & l'Electeur de Coloigne, ne diront pas qu'il ait rien eu

du leur, il a Hollande & Zelande païs de tres-difficile conquête à recouurer contre l'Anglois, & reparer les pertes de Portugal contre le Turc, ayant ces affaires, il ne peut qu'il ne nous aime mieux auoir pour amis que pour ennemis : au reste le Royaume estant moindre qu'il n'est & repurgé d'heresie, il pourra plus faire de bien à la Republique Chrestienne & à soy-mesme, qu'il ne sçauoit faire avec la corruption presente, quand il seroit plus grand que toute l'Asie.

TANT ya que sil nous faut craindre vsurpation de l'estranger, il y en a beaucoup plus de matiere de la part de l'Anglois que du costé de l'Espagnol.

L'ANGLAIS est vn oyseau de proye qui volle par tout, il a entrepris sur l'Ecossois ce qui luy appartient en Irlande, sur nous en diuers temps plusieurs provinces, puis le Royaume du temps de Charles 6. en l'an 562. il fest saisi du Haire de grace, & aujourd'huy il tiét la ville de Dieppe, il a vsurpé sur l'Espagnol, Hollande & Zelande.

L'ESPAGNOL de nostre temps n'a entrepris sur personne, ce qu'il fest saisi

de Portugal a esté à tiltre hereditaire, & comme parent du Roy dernier decedé, plus proche que le bastard Domp Antonio, quand il seroit legitime.

LES Anglois & Espagnols ont tous deux fait guerre contre noz peres, les Espagnols avec telle obseruation du droit des Gens, que nous auons tousiours eu meilleure compositiō d'eux que de tous autres: & de faict en la guerre de Charles cinquiesme, noz peres parlans de leurs ennemis en general, ils les appelloient Bourguignons & non Espagnols, mais quand aux Anglois, ils nous ont faict la guerre si cruellement qu'il ne se peut dire, les vestiges y sont encores, leur haine est inueterée & immortelle contre nous pour les auoir chassé du Royaume, qu'ils pretendēt obstinement leur appartenir, comme ils donnent assez à entendre par leur escu, qui est my-party des armes d'Angleterre & de Frâce, mesmes le iour de Toussaincts, ils ont fait sentir leur cruauté iusques aux enfans de dix à douze ans.

QUAND il nous rencontrent en leur pais, ils nous couldoient fils ne peuuent pis faire,

pis faire, en France mesmes ils se preferent à nous, de contenance, de parole & d'effect si leur est possible.

L'ESPAGNOL nous laisse marcher librement en Espagne, hors son païs & le nostre, il confere avec nous par raison. S'il a la parole & la contenance graue, l'Anglois est encores plus fier.

IL y en a qui passent outre, & dient qu'ès villes que l'Espagnol tient, il donne les Offices & Benefices à ceux de sa nation, comme si par notorieté de faict, il ne dōnoit pas les Offices aux originaires des païs où il commāde, & si ne laissoit pas les Benefices aux Eslections. La Flandres & la Frāche-Comté sont trop pres pour en doubter.

ON nous veult faire encores d'autres terreurs Panniques, on diēt que ses gens de guerre sont cruels, sa domination tyrannique, & son inquisition insupportable.

QUANT à la cruauté des guerres, les Flamés depuis leur rebellion recognoissent que leurs propres soldats originaires sont plus molestes que l'Espagnol, ils sçauent qu'apres la redeuance ordinaire,

il ne se parle plus de subsides. Sicile, Naples, Milan, la Franche-Comté, & toutes les autres prouinces qui luy obeïssent en diront autant : & au regard de l'inquisition, ce n'est que douceur aupres de nostre chambre ardente, & si on la cõpare à l'inquisition d'Angleterre, c'est iustice contre iniustice, equité contre iniquité.

IL n'y a peuple qui ne haïsse ordinairement ses voisins, le Portugois en a esté ainsi à l'endroit de l'Espagnol, mais depuis qu'il a experimenté la droicte & entiere iustice du Roy Catholique, il s'estime plus heureux que iamais.

DONC pour mettre fin à ce propos, si à faute d'employer le secours d'Espagne, nous cedõs en force à l'ennemy, cõme nous ne pouuõs long-temps resister sans miracle, nous ferons deuant Dieu coupables de la religion perduë, & tout le monde vniuersel nous dõnera blasme de nostre ruine & des pertes qui s'en ensuiuront.

AV demourant chacun sçait les conquestes faites par le Turc en la Chrestienté depuis l'alliance des Valois avec ce chien, qui est continuee par le Bearnois

esperant que par ce moyen les forces du Roy d'Espagne destruićtes, il plantera librement son heresie & recoufira son Royaume de Nauarre pretendu, ne preuoyant que ce chien qui abbaie par tout apres auoir subiugué le surplus de l'Europe, luy fera porter le Turban ou perdre tout ce qu'il possedera.

O R si nous conuenons avec le Catholique, il est à esperer que le Turc ne nous osera regarder pour mal faire, nous ferons donc noz deuotieuses prieres à la bonté diuine qu'il dissipe ces tenebres d'ignorance, dōt Sathan veut offusquer noz esprits, & qu'il luy plaise nous illuminer & inspirer en sorte que nous ne retardions rien, mais que nous poursuivions incessamment tout ce qui est de nostre salut & de son honneur: Gardōs nous bien de penser que ce soit peu de mettre en hazard la religion, comme elle est si nous negligons le secours des voisins qui boient & mangent avec nous, en mesme table vne mesme viade & mesme breuuage celeste. Ceux qui abusent d'une chose prophane baillee en depost commettent larcin, Que sera-ce si nous

abandonnons vne chose sacree & si sainte, que la religion qui nous a esté baillee en garde pour la laisser à noz successeurs? Noz peres nous l'ont conseruee & mise en main à la perte de leurs biens & de leurs vies, ils sont avec leurs saints Rois, Charles & Loys vollez heureusement au ciel. Noz enfans attendent de nous les mesmes offices, si nous les en frustrons, nous ne ferons pas tant seulement coupables du mal que nous ferons en noz personnes, mais de toutes les offenses qui seront cōmises par la posterité à faute de iouir du bien de la parole de Dieu & de ses saints Sacremens, tellemēt que de iour en autre, nous sentirōs augmenter les peines de nostre damnation.

QUEL regret pensez vous que ce soit aux pauures Anglois Catholiques de n'auoir entendu aux belles ouuertures qui luy ont esté faictes par le Roy d'Espaigne, durant son mariage & de la Roynne Marie, par le moyen desquelles ils pouuoient sauuer la vie à cinq cens mil personnes, que la Iezabel a depuis faict mourir par les mains des bourreaux, ou par dures & cruelles prisons, ou par fuit-

res, bannissement & spoliations de tous biens.

Ces pauvres gens auoient les esprits eutorpiques de ces sottes opinions d'arrogance Espagnole, & persuadez de vaines presomptions d'eux-mesmes, s'asseuroient que sans le secours de l'Espagnol, ils se pouuoient maintenir au Christianisme cōtre qui q̄ ce fust, chacun sçait ce qui en est aduenue, ils ont miserablemēt perdu leurs parens, leurs amis, leur liberté, leurs biens, & ce qui est le plus lamentable & desplorabile, la religion.

Nos voisins endurent iournellemēt toutes extremitez pour se deffendre cōtre le Turc, à fin que par sa conference le Christianisme ne reçoie diminutiō, encores que ce soit chose experimentee de tout temps qu'il laisse liberté de religion à ses subiects.

NOSTRE tyran de Bearn postposant tous honneurs tous biēs & toutes commoditez de la vie, s'est exposé en mil & mil dangers pour semer les heresies de Calvin.

ET nous quoy? ferons nous enfans legitimes, ou bastards infames de ces

François anciens qui ont outrepassé les mers pour faire la guerre cōtre les Turcs dont ils ont rapporté tant de belles victoires, serōs nous submis honteusement à la puissance heretique plus insupportable mille & millions de fois que la domination des Turcs, lesquels permettrēt au Chrestien faire son salut, dont il est empêché par les Calvinistes, tellement impatiens de nostre religion, que quand leur Roy les voudroit contraindre de vivre avec nous, il luy seroit impossible se faire obeïr trois mois entiers. On sçait trop quels sont leurs deportemens, dont Dieu nous preservera s'il luy plaist, auquel soit honneur & gloire par tous les siecles des siecles. Amen.

MONSIEUR mon cousin respecterois que mes prieres auroient quelque force en vostre endroit, & qu'en vostre discours vous parleriez des causes pour lesquelles il n'est possible faire paix avec le tyrā de Bearn, sans nous perdre avec la religiō, ce que toutesfois vous avez

passé sous silence: Vous auez, comme ie croy
 estimé chose indigne traicter ceste question en-
 tre Catholiques, ausquels seuls vostre escrit
 s'adresse, aussi est-ce la verité que Iehu par la
 volonté de nostre Dieu a rabattu toutes paro-
 les de paix qui luy ont esté tenuës par les hereti-
 ques de son temps: toutesfois vous n'aez peu
 faire en sorte que parlant d'autre chose, vous
 n'ayez touché cinq raisons pertinentes: La
 premiere, que nostre Dieu deffend aux siens
 toute communication avec les heretiques, com-
 me on voit que Iosaphat a esté puny de s'estre
 associé avec Ochozias: Et au contraire Iehu
 recommande d'auoir mis en arriere tous propos
 de la paix que les heretiques luy ont demandee:
 La seconde, que le tyran & tous les siens sont
 excommuniez par la Bulle du S. Pere: La troi-
 siesme, que c'est vn fedifrage qui a rompu &
 violé toutes ses promesses iurees en faisant les
 Edicts de pacificatiõ: La quatriesme, que quãd
 il seroit homme de parole, ce qu'il n'a iamais
 esté, il luy seroit impossible se faire obeyr par les
 siens en la conseruation de nostre religion: Et
 la cinquiesme que ceste paix faciliteroit les en-
 treprises du Turc cõtre le Roy Catholique sans
 le secours duquel nostre Royaume ny les pro-
 uinces adiacentes ne se peuent deffendre d'une

prochaine inuasiō de ce Mahometiste : Au reste ie vous apprens vne histoire que ie tiens de gēs de bien, & tesmoins sans reproche, Le Côte de Montbazon ayant proposē à ceux de la Nobleſſe qu'il estimoit Catholique, que nostre ennemy faisoit dēs long-tēps contenance de vouloir entendre à nostre religiō, mais qu'il failloit qu'il ſen resolust, & qu'au demeurant il asseurast les Ecclesiastiques, il fust descouuert au tyran, lequel pour frustrer ce ieune seigneur d'une entreprise qu'il cognoissoit luy estre si dommageable, il luy fit tant d'honneur & de caresses, & usa au surplus de tant d'artifices, qu'il luy ferma la bouche iusques à sa maladie, dont il est decedē, avec deux regrets extremes, l'un d'auoir ſuiuy le party de l'ennemy, l'autre de ne l'auoir pressē de se resoudre à la religion, & d'asseurer l'estat Ecclesiastique : Vous m'excuserez si i'ay fait ioindre c'est extrait au bout de vostre aduis, quand vous ſçaurez que i'en ay esté prié par un de noz amis communs, lequel se delibere d'en escrire plus amplement, ſil se trouue quelqu'un si impudent que de soustenir le contraire. Et sur ce, ie prieray nostre Seigneur vous continuer ses saintes graces.

Vostre cousin & meilleur amy.